



Osterøy kommune  
Rådhuset  
5282 LONEVÅG

Saksbehandlar, innvalstelefon

Hege Brekke Hellesøe, 5557 2352  
Aase Bruntveit Njøs, 5764 3106

## Uttale til offentlig ettersyn av kommuneplan for oppvekst i Osterøy kommune.

Skular, barnehagar og eit godt kulturtilbod er ein føresetnad for eit godt bu-miljø. Oppvekstplanen til Osterøy kommune skal vera eit utviklings- og styringsverktøy for kommunen. Planen må difor knytast tett opp til andre planar i kommunen, som både samfunnsdel- og arealdel og særleg økonomiplan og plan for idrett og fysisk aktivitet. Plan for idrett og fysisk aktivitet omhandlar psykisk og fysisk helse, fysiske oppvekstmiljø og kultur og fritid.

Ei god overordna og heilskapleg planlegging, vil kunne medverke til at barn og unge får eit godt tenestetilbod og utsette born vil kunne få hjelp på eit tidleg tidspunkt. Dette gjeld også møteplassar, uteareal og tilgang til grøne område nær barnehagar, skular og andre institusjonar. Dette er stader som gir gode opplevingar og kjensler av å høyra til. Med samlokalisering av ulike offentlege og private funksjonar og aktivitetar, kan ein få til meir utvikling i eit lokalsamfunn og styrkje moglegheita til å realisere det økonomisk.

Struktur, innhald og språk:

Planen er delt i kunnskapsgrunnlag, handlingsdel og ei brosjyre. Dette er ein fin inndeling, som gjer oppvekstplanen meir tilgjengeleg og lesbar for alle. Planen vert også lettare å bruke for tilsette som arbeider med born og unge.

Planen er delt inn i gode og viktige satsingsområde:

- Mangfald, inkludering og toleranse
- Relasjonar
- Psykisk og fysisk helse
- Læring
- Fysisk oppvekstmiljø
- Kultur og fritid
- Samfunnsengasjement og påverknad

Desse områda har overlappande utfordringar og strategiar, slik det kjem fram i planen. God inkludering i eit oppvekstmiljø, vil bidra til eit samfunn som aksepterer ulikskap, har tillit kvarandre



og god livskvalitet. Kulturliv og andre former for fritidsaktivitetar som friluftsliv og fysisk aktivitet er viktige arenaer for kvardagsintegrering og fellesskap basert på mangfald, likestilling, ytringsfridom og toleranse. Alle skal ha reell lik tilgang til kulturgoda, uavhengig av bakgrunn. Det er også viktig å leggje til rette for til dømes lågterskel aktivitetar, gode transportordningar til og frå aktivitetar og ferieaktivitetar for låginntektsfamiliar.

Kunnskapsgrunnlaget, handlingsdelen og brosjyren bør utbetrast, slik at dei språklege formuleringane blir meir like. På den måten kan kunnskapsgrunnlaget verte lettare å nytte for alle, og alle kan kanskje då tolke planen likare.

I kunnskapsgrunnlaget vert det også vist til mykje teori, innanfor einskilde område (relasjonar). Det er også viktig at det kjem fram kva som er tilhøva på Osterøy. Kva vert gjort i barnehage og skule i dag? Kva bør vidareførast? Kva bør utbetrast?

Det står mellom anna at Osterøy kommune har fleire pedagogiske verktøy som vert nytta både av barnehage og skule for å førebyggje og å handtere ekskludering og mobbing. Her kunne det vore tydlegare presisert kva pedagogiske verktøy ein har i dag, og kva som er utviklingspotensialet.

I planarbeidet er det også viktig at barn og unge si stemme kjem fram. Gjennom ungdomsrådet kjem det fram at ungdom i Osterøy har uttrykt ynskje om uorganiserte fritidstilbod. Har til dømes ungdomsrådet vorte høyrte i samband med planarbeidet? Kva med undersøkingar blant elevgrupper? Kvifor sit ungdommar så mykje heime? Kvifor er det auke i tal born og unge som slit med psykiske lidningar? Med fleire undersøkingar (barn og unge si stemme) og eit breiare kunnskapsgrunnlag vil det verte lettare å setje inn dei rette tiltaka og gjere prioriteringar i handlingsdelen. I planarbeidet må det også sikrast at barn og unge som krev særskilt tilrettelegging vert høyrde.

I kunnskapsgrunnlaget kan også teksten konkretiserast meir, slik at det til dømes kjem fram korleis ein sikrar høg kvalitet på tilpassa opplæring og at det vert gitt eksempel på haldningsskapande arbeid.

I handlingsdelen er det konkrete og gode tiltak. Det er viktig at dei tiltaka som skal gjennomførast, er realistiske. Handlingsdelen skal også reviderast kvart år. Då kan planen justerast og endrast i tråd med utfordringar og behov, og på den måten vert planen meir levande.

Handlingsdelen kan også godt vise medansvar/ samarbeidspartnarar hjå innbyggjarar, frivillige, lag og organisasjonar i tiltak der desse er naturleg å inkludere. På den måten kan føresette og frivillige bli gjort meir ansvarlege i born sin livskvalitet og psykiske helse.

Idet vidare arbeidet bør kommunen sjå på ord som mellom anna uhelse og skeivutvikling, og erstatte desse med meir positivt lada og adekvate ord. Uhelse er eit omgrep utan tradisjonell forankring i det norske språket, men har vorte noko nytta i samband med helsefremjande og førebyggjande innsats. Som oftast vert ordet nytta som eit samleomgrep på fenomen som verkar nedsettande på evna til normal eller ynskt livsutfolding som til dømes sjukdommar og funksjonssvikt, på engelsk kalla ill-health.

Vi viser også til uttale frå Hordaland fylkeskommune.

Lukke til med vidare planarbeid.



Med helsing

Anne Kristin Eitungjerde  
fung. kommunaldirektør

Svein Kornerud  
fagdirektør

*Dokumentet er elektronisk godkjent*